



24. oktoberi 2016.

UKA 2016/73

(Naqqiut)

(Siunnersuut 19. juuli 2016-imik ullulerneqarsimasooq taarserpaa, qulequtaani oqaaseq “aallaavigalugu” peerneqarpoq. Allamik allannguummi ilanngussisoqanngilaq.)

Inatsisartut Suleriaasianni § 33 naapertorlugu alajangiiffigisassatut siunnersuut imaattoq matumuuna saqqummiuppara:

Atuarfinni sorlerni meeqqanut inuusuttunullu ajornartorsiutitik pillugit saaffigisinnaasaminnik amigaateqarnersut pillugit, amigaatillu taakku qanoq iliuseqarfigineqarsinnaanersut pillugit pilersaaruteqartoqarnersooq Naalakkersuisut UPA 2017-imut nalunaarusiornissaannik suliniuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq, Anthon Frederiksen, Partii Naleraq)

Tungavilersuut:

Qularnanngilaq inuiaqatigiinni aaqqissugaanitta nalilersorluarneqarnissaa pisariaqarluinnalersimasooq. Ilaatigut MIO`p 2015-mut nalunaarusiamini meeqqat inuusuttuaqqallu assigiinngitsunik imaannaanngitsunik telefonikkut SMS-imikkullu saaffiginnittartut amerliartornerata tamanna uppernarsisimmagu.

Ilumullimi angajoqqaat tamatta akisussaafitta pisussaaffittalu tamakkiisumik paasilluarlugit meeqqatta ajunnginnerpaamik toqqissisimanartunillu atugassaqaartinneqarnissaat anguniarlugu aallunnerusuugutsigu, taava meeqqat nuannaarlutik allaniillu ikiorneqarnissamik pisariaqartitsinngitsut amerlanerujussuussagaluarput, kisianni pissutsit piviusut ajoraluartumik taamaaqqajanngillat.

Soorlu tamanna MIO`p 2015-imut nalunaarusiaani aamma ersersinneqartoq. Tassa meeqqat inuusuttuaqqallu ilaat amerlavallaarujussuuartut ajornartorsiutinik imaannaanngitsunik nalaataqartarsimasut tassuuna takuneqarsinnaammat.

Soorunami uani siunnersuuteqarninni taanna kisiat tunngavilersuutiginnilara, tassami aamma siusinnerusukkulli meeqqat inuusuttuaqqallu pillugit misissuisarnerpassuit assigiinngitsut takutittareerpaat, meerarpassuit inuusuttuararpassuillu qularnanngilluinnartumik angajoqqaaminniit naammattumik isumagineqannginneq pissutigalugu, atorneerluinernut assigiinngitsunut nakkaateqqajaasartut.

Meeqqat inuusuttuaqqallu taama nalaataqarsimasut aamma inersimasuniit kinguaassiuutitigut atorneerlunneqarnissamut qaninnerpaajusartut maluginiarneqartarpoq.

Tamakkulu ilaatigut kingunerisarpaat imminornissamik eqqarsalernerit, soqutigitsaatsunngornerit, inuunerlunnissamut, atorneerluinernut allanullu pitsaasumik ineriartornissaralumut akerliusumik inuuneqalernerit.

Pissutsit taamaattut angajoqqaaniit, meeqqanut taakkualu kinguaavinut kingornuttaganngortarput pitsaasuunngitsut, qaangerneqartariaqartullu.

Meeqqat inuusuttuaqqallu september 2014 tikillugu angerlarsimaffiup avataanut inissinneqarsimapput 642-pput, qularnanngilaq kisitsit taanna qaffariarsimassasoq, naak tamanna neriunanngikkaluartoq.

Kisianni ajoraluartumik upernaq manna ataatsimiinnitsinni Isumaginninnermut Naalackersuisup ilimagisai naapertorlugit meeqqat inuusuttuaqqallu angerlarsimaffiup avataanut inissinneqarumaartut suli amerlanerusinnaanerit ilimagineqarput.

Pissutsit taamaatsillugit, minnerunngitsumillu MIO`p nalunaarusiaa kingulleq naapertorlugu takusinnaavarput, meeqqat inuusuttuaqqallu ajornartorsiutit imaannaanngitsut pillugit ikiorneqarnissamut saaffissaqarnissamik amigaateqartut.

Taamaammat meeqqat inuusuttuaqqallu imaannaanngitsunik ajornartorsiuteqartut orniguffigisinnaasaannik saaffissaqarnissaat pisariaqartorujussuusoq takuneqarsinnaavoq.

Taamaattumik meeqqat inuusuttuaqqallu kommuneqarfinni tamani kommunit qanimut suleqatigalugit saaffiginnittarfissaannik pilersitsisoqartariaqarpoq.

Qularutiginnilarput partiit tamatta meeqqat inuusuttuaqqallu sapinngisamik pitsaanerpaanik atugassaqarnissaat pillugu sulissuteqarnissarput. Qilanaarpugullu meeqqat inuusuttuaqqallu amerlanerpaat pitsaasunik atugaqalernissaannut suleqataalluarnissassinnut.

Allaffissornikkut aningaasatigullu pisortanut kingunerisinnaasai:

Nalunaarusiornissap suliarinerani allaffimmi sulisut ukiumut naammassisinnaasaata sisamararterutaata atorneqarnissaa taggipparput.

Meeqqat inuusuttullu timikkut tarnikkullu peqqissut amerlanerusut ilorraap tungaanut ingerlariaqqiffissinniarlugit pisortaqaarfinni suliaaersut atortullu pioreersut atorluarlugit pisinnaasoq naatsorsuutigineqarsinnaavoq.

Naatsorsuutigaarput suliniut Naalakkersuisunit aallartinneqassagaluarpata, kommunillu qanimut suleqatigineqarlutik, pilersaarummik piviusunnngortitsinermut aningaasartuutaajumaartussat kingusinnerusukkat Naalakkersuisunit saqqummiunneqarumaartut.

Allaffissornikkut aningaasatigullu inuiaqatigiinnut kingunerisinnaasai:

Naalakkersuisut meeqqat inuusuttullu atuarfinni saaffissaqarnissaannik suliniuteqarniarlutik aallartissagaluarpata, aallaqqaamut soorunami pilersitsinissaq aningaasanik atuiffigineqassasoq naatsorsuutigisariaqarpoq.

Kisiannili piffissaq ungasinnerusoq isigalugu meeqqat naammattumik angajoqqaaminnit isumagineqalernerisigut aningaasanik sipaaruteqalersinnaaneq naatsorsuutigisariaqarpoq.

Avatangiisinut kingunerisinnaasai:

Meeqqat inuusuttuaqqallu suli pitsaaneruseqaruninik ingerlariaqqinnissaminnut periarfissinneqaruninik, avatangiisiminnut pitsaasumik kusanartumillu sunniuteqarnissaat naatsorsuutigineqarsinnaavoq.